

清

史

稿

自通州運京師或謂水次支散可省轉般費宏祚持不可謂水次支散受者艱負載必減直而售則米狼戾在外京倉領給雖有糶者顆粒皆在都下根本至計不宜以小利遽變又有議盡裁州縣存留與變漕糧官運爲商運者固爭不得具疏上之卒如宏祚議六年用輔政大臣鼐拜議戶部增設滿尙書以授瑪爾賽與宏祚齟齬七年戶部失察書吏假印盜帑大學士班布爾善獨罪宏祚坐奪官八年鼐拜得罪起宏祚兵部尙書九年以老乞休命馳驛歸里食原俸宏祚中道疾作僑居江甯念未終事父母輯永思錄自號曰思齋十一年疏辭俸諡曰卿在官著有勞績引年乞休賜祿頤養母固辭十三年卒賜祭葬諡端簡

姚文然字弱侯江南桐城人明崇禎十六年進士改庶吉士順治三年以安慶巡撫李猶龍薦授國史院庶吉士五年改禮科給事中六年疏請敕撫按道恩詔清理刑獄勿任有司稽玩條赦之外有可矜疑原宥者許專疏上陳又請重定會試下第舉人選用例以廣任使又言直隸與山東河南接壤盜賊竊發東

西竄匿難於越境追捕請改保定巡撫爲總督轄直隸山東及河南懷慶衛輝彰德三府又請敕各省督撫勿濫委私人署州縣官諸疏皆下部議行尋轉工科八年世祖親政疏請令都察院甄別各省巡按下部院會議以六等考核黜陟有差是歲江南浙江被水文然請災地漕米改折視災重輕定折多寡既又言折漕例新定民未周知官吏或折外重征耗銀或先已征米而又收折或折重運輕其弊不一請敕漕臣密察嚴劾上並採納十年疏言大臣得罪不當鎖禁得旨允行遷兵科都給事中乞歸養康熙五年起補戶科給事中六年疏言四川湖廣諸省官吏借殿工採木搜取民間屋材墓樹宜申飭禁止又言採買官物其由官發價者如有駁減餘銀例貯司庫若價出自民餘銀宜還之民間又言案牘煩冗滋弊一部可逕結之事卽應一部逕結一疏可通結之事卽應一疏通結若各省錢糧考成已報完者部臣宜於議覆時卽予開復均如所請九年考滿內陞命以正四品頂帶食俸任事故事給事中內陞還籍候補留任自文然始文然與魏象樞皆以給事中敢言負清望號姚魏十年兩江總督麻

勒吉坐事逮詣京師仍用鎖繫例文然復上疏論之上諭自後命官赴質概免鎖繫著爲令尋遷副都御史再遷刑部侍郎十二年調兵部督捕侍郎京口副都統張所養劾將軍柯永葵徇私縱恣令文然往按永葵坐罷遷左都御史十三年疏言福建耿精忠廣西孫延齡皆叛應吳三桂中間阻隔賴有廣東精忠將士舊駐其地熟習山川形勢倘與延齡合謀相犄角則廣東勢危江西境與福建廣東接倘侵據贛州南安驛道中斷饑阻郵梗宜駐重兵通聲援上嘉納之陝西提督王輔臣叛河南巡撫佟鳳彩引疾上已許之文然言河南近陝西流言方甚鳳彩得民心宜令力疾視事上爲留鳳彩文然屢有論列尤推本君身請節慎起居孝誠皇后崩權擯鞏華城上數臨視文然密疏諫且引唐太宗作臺望昭陵用魏徵諫毀臺事相擬上亦受之不拂也十五年授刑部尙書時方更定條例文然曰刃殺人一時例殺人萬世可無愼乎乃推明律意鉤稽鞫討必劑於寬平決獄有所平反歸輒色喜嘗疑獄有枉爭之不得退長跪自責又以明季用刑慘酷奏除廷杖及鎮撫司諸非刑十七年卒賜祭葬諡端恪文

然清介里居幾不能自給在官屏絕餽遺晚益深研性命之學子士基官湖廣羅田知縣士塾官陝西朝邑知縣皆有治行

魏象樞字環極山西蔚州人順治三年進士選庶吉士四年授刑科給事中疏言明季大弊未禁革者督撫按聽用官舍太雜道府州縣胥隸太濫請嚴予清釐報可五年劾安徽巡撫王懷受賕庇貪吏懷坐罷轉工科右給事中時以滿漢雜處不便令商民徙居南城象樞疏言南城地狹商民貨買無房拆蓋無地請下部察官地官房俾民輸銀承業復疏請更定會典並下部議行七年轉刑科左給事中八年世祖親政有司有以私征侵帑坐罪者象樞疏陳其弊請飭州縣依易知單造格眼冊注明人戶姓名糧銀款目及蠲賑清數上大吏覈驗印發開征又請定布政使會計之法以杜欺隱立內外各官治事之限以清稽滯皆見施行復疏言聖政方新機務孔多中外相望治平非同昔日上近巡京畿輔臣當陪侍法從盡啓沃之忠倘遠有臨幸亦宜諫止鑾輿副保傅之責又因災變上言謂天地之變乃人事反常所致語侵權貴尤急九年轉吏科都給

事中十年大計疏請復糾拾舊制言官糾拾未得當不宜反坐下所司著爲令
因復疏言順治四年吏科左給事劉樞以糾拾被譴宜予昭雪上爲復樞官總
兵任珍失職怨望並擅殺其家人下九卿科道議罪大學士陳名夏等二十八
人別爲一議象樞與焉上責其徇黨負恩下部議罪應流寬之命留任十一年
大學士甯完我劾名夏辭連象樞謂象樞與名夏姻家牛射斗有連象樞糾劾
有誤吏部議降級名夏改票罰俸命逮問象樞自陳素不識射斗得免議尋以
名夏父子濟惡言官不先事論劾各科都給事中皆鑄秩象樞降補詹事府主
簿稍遷光祿寺丞十六年以母老乞終養康熙十一年母喪終用大學士馮溥
薦授貴州道御史入對退而喜曰聖主在上太平之業方始不當以姑且補苴
之言進乃分疏言王道首教化滿漢臣僚宜敦家教督撫任最重有不容不盡
之職分不容不去之因循宜責成互糾制祿所以養廉今罰俸例太嚴密宜以
記過示罰增秩示恩治河方亟宜蓄人才備任使戒淫侈宜正人心勸風俗宜
修禮制聖祖多予褒納復疏糾湖南布政使劉顯貴侵公帑不當內陞給事中

余司仁欺罔不法皆坐黜十二年以歲滿加四品卿銜尋擢左僉都御史十三年歲三遷至戶部侍郎會西南用兵措兵食察帑藏多所規畫疏論籌餉請確估價直嚴覈關稅慎用各直省布政使十七年授左都御史疏言國家根本在百姓百姓安危在督撫願諸臣爲百姓留膏血爲國家培元氣臣不敢不爲朝廷正紀綱爲臣子勵名節因上申明憲綱十事上嘉其切中時弊各直省舉劾屬吏多失當江蘇嘉定知縣陸隴其有清名而被劾罷象樞疏薦之鎮江知府劉鼎瀾職題陞糧道山西絳州知州曹廷兪劣跡顯著糾察不及象樞疏劾之磨勘順天鄉試卷因陳科場諸弊請設內簾監試御史考核各直省學道舉勞之辨邵嘉劾盧元培程汝璞上如其議以爲黜陟十八年遷刑部尙書象樞疏言臣忝司風紀職多未盡敢援漢臣汲黯自請爲郎故事留御史臺爲朝廷整肅綱紀上可其奏以刑部尙書留左都御史任分疏劾山西巡撫王克善權稅蕪湖主事劉源諸不法狀皆坐黜七月地震象樞與副都御史施維翰疏言地道臣也臣失職地爲之不寧請罪臣以回天變上召象樞入對語移時至泣下

明日上集廷臣於左翼門詔極言大臣受賕徇私會推不問操守將帥克敵焚廬舍俘子女攘財物外吏不言民生疾苦獄訟不以時結正諸王貝勒大臣家人罔市利預詞訟上千天和嚴飭修省是時索額圖預政貪侈詔多爲索額圖發論者謂象樞實啟之尋命舉廉吏象樞舉原任侍郎雷虎班迪達哈塔高珩大理寺卿瑚密色郎中宋文運侍講蕭維豫布政使畢振姬知縣陸隴其張沐几十人上諭曰雷虎朕亦聞其清以其怠惰罷黜既經象樞特薦授內閣學士班迪清慎因使往江西按事未能明晰問以民間苦樂又謝不知以是齔秩餘令吏部議奏錄用十九年仍授刑部尙書尋命與侍郎科爾坤巡察畿輔按治豪猾還奏稱旨象樞有疾上賜以人參及參膏命內侍問飲食如何二十三年奏事乾清門躡焉卽日疏乞休再奏乃許之命之入對賜御書寒松堂額令馳驛歸二十五年卒年七十一賜祭塋諡敏果象樞以馮溥薦再起象樞見溥問何以見知溥曰昔余爲祭酒故事丁祭不得陪祀者當於前一日瞻拜君每期必至敬慎成禮一歲直大雨君仍至肅然瞻拜而去此外無一人至者余以是

知君篤誠子學誠進士授中書上推象樞恩改編修官至諭德嘉慶間錄賢良祠諸臣後裔賜象樞四世孫煜舉人

朱之弼字右君順天大興人順治三年進士授禮科給事中轉工科都給事中八年疏言國家宜重名器舊制胥吏供役年久無過予以議敘選用佐貳今戶兵等部書役別繫職銜非官非吏有玷班行此曹起自貧乏不數年家資鉅萬衣食奢侈非舞文作奸何以致此戶兵堂司官歲有遷轉此曹歷年久不去官爲客吏爲主流弊何窮請嚴察褫奪下部議行九年以父喪去十一年起補戶科都給事中十二年疏言小民納糧一也而其目有四曰漕糧白糧軍糧恤孤糧軍糧恤孤糧程限遲緩無增耗之費有力之家往往營求撥兌單弱之戶派納漕白苦樂不均軍糧行折色軍得銀則妄費生掛欠之弊恤孤糧半飽豪強鰥寡孤獨無由控訴請飭漕臣下各省糧道親督州縣畫一編徵盡數輸納敢有撥兌者治罪又言錢糧侵欠兵食不充爲上所屬念侵欠之大者曰漕欠糧欠漕欠責漕督親督糧道糧欠責督撫親督布政使令本年附徵某年欠項逾

限不完以溺職論有司侵虧怠緩糾劾不貸如此則年銷年欠宿逋可清上慰其言並嚴飭行又疏言國家章制大備部臣實心任事利自知舉弊自知革今乃盡若事外遇事至才者不肯決無才者不能決稍重大卽請會議不然行外察報遷延歲月而已不然聽督撫參奏科道指糾而已不然苟且塞責無容再議而已上下相諉彼此相安國家事安得不廢百姓安得不困欲致太平必無之事也臣愚謂今日求治首在擇人上面召諸大臣親試才品因能授任復考其歷事後興利幾何除弊幾何定功罪信賞罰則法行而事舉矣上納之獨言諭六部去怠忽舊習一歲中四遷授戶部侍郎十三年河西務鈔關員外郎朱世德徵稅不如額戶部援赦請免議上切責譴部臣之獨降三級十五年授光祿少卿再遷左副都御史疏言巡按未得其人當責都察院考核巡按之賢不肖卽都察院堂上官賢不肖臣與諸巡按約操守當潔清舉劾當得宜撫按當互糾臣等定差不公考核不當巡按賢者不薦不肖者不糾諸御史亦得論劾至巡方應行諸事當令掌河南道會諸御史各抒見聞奏請明定畫一從之世

祖惡貪吏命官得贓十兩役得贓一兩皆流徙令既行之弼疏論其不便略謂
自上諭宣傳後撫按所糾必無以大貪入告者何則一經提問有司無不圖保
身命雖盈千累百而及其結贓期不滿十兩而止是未糾以前徒層累而輸於
大吏被糾之後又層累而輸於問官尺籍所科百不一二蓋雖起嬰黃爲今之
有司未有不犯十兩之令者而今普天之下皆不取十兩之有司豈真山古循
吏上哉良以令嚴則思遁徒有名而無其實也上但擇撫按一大貪者懲之一
大廉者獎之則衆貪懼衆廉奮矣會歲旱求言之弼疏言山東巡撫耿焯河南
巡撫賈漢復以墾荒蒙賞兩省百姓即以賠熟受困歲增數十萬賦稅多得之
於鞭笞敲剝呼天搶地之子遺怨苦之氣積爲沴厲又疏劾戶部賑濟需遲救
荒無術京師旣得雨河南報彰德衛輝以旱成災戶部奏上步禱天壇時雨方
降彰德衛輝地接畿南何獨請蠲恤請覆勘之弼疏爭略謂百里不同風千里
不同雨安得以輦下例率土且以撫臣疏報爲不可信而又倚以覆勘使撫臣
告災如前部臣信之不可不信必易人而勘徒使地方增煩擾耳自夏徂冬被

災州縣未盡停徵待勘明已至來春雖獨免徒飽吏囊饑民轉爲溝中瘠久矣與尙書王宏祚廷辨卒從之弼議十八年復授戶部侍郎康熙四年調吏部五年遷左都御史擢工部尙書六年疏言福建官兵月米五十餘萬石歲徵十萬餘石餘皆糴諸市石值銀二兩四錢朝廷買米養兵絕不抑值以累民臣聞延建汀邵諸府民以買米攤賠爲累有願繳田入官者漳泉之間按地派米石必加六斗又迫令折價三四兩不等數倍於正供民不勝其腴削上特諭督撫嚴察七年調刑部八年疏言各省存留錢糧順治間軍需正迫有裁減之令昨年部臣又請酌減存留各欸原爲留備地方公用事不容已費無所出勢不得不派之民間不肖有司因以爲利宜復康熙七年以前存留舊例又疏言八旗家丁每歲以自盡報部者不下二千人人人雖有貴賤均屬赤子請敕諭八旗凡蓄僕婢當時其教誨足其衣食卹其勞苦減其鞭笞使各得其所歲終刑部列歲中自盡人數係某旗某家具冊呈覽俾人知儆惕又言世祖嚴治貪官蠹役特立嚴法如非官役不用此例今不論有祿無祿通用重典貪蠹事發被證畏同

罪刑訊不承使大貪漏網請嗣後因事納賄仍擬同罪如逼抑出錢倘非官役許用舊律詔並如所請九年調兵部十四年以母喪去官十七年起授工部尙書二十二年會推湖北按察使之缺舉道員王垓不當上意以所舉非材吏部議降三級調用尋卒之弼內行修篤事親孝與其弟之佐相友愛之佐順治十四年進士選庶吉士歷官侍讀學士嚴事之弼雖白首執子弟禮甚謹

趙申喬字慎旂江南武進人康熙九年進士二十年授河南商邱知縣有惠政二十五年以賢能行取命以主事用二十七年授刑部主事三十年遷員外郎以病乞歸四十年以直隸巡撫李光地薦召見上察申喬敬慎趙擢浙江布政使陞辭上諭曰浙江財賦地自張鵬翮後錢糧多蒙混當秉公察核不虧帑不累民布政使爲一省表率爾清廉屬吏自皆守法申喬頓首謝曰臣蒙皇上特擢不貲勉爲好官請置重典申喬上官不挾幕客治事皆躬親例得火耗悉屏不取四十一年上諭獎申喬居官清能踐其言就遷巡撫布政使舊有貼解費歲支不過十之五申喬積二千餘金封識以授代者曰吾奏銷不名一錢後將

難繼得此足辦一歲事毋以擾民也錢塘江湖留塘申喬令鎔鐵貫石築子塘
爲護湖南鎮鎮紅苗殺掠爲民害民走京師叩閣陳狀給事中宋駿業因劾總
督郭琇巡撫金璽提督林本植諱匿不爲民去害上命侍郎傅繼祖甘國樞及
申喬往按盡發紅苗殺掠害民狀琇等皆坐罷調申喬偏沅巡撫四十二年疏
言與總督喻成龍檄衡永道張士可入苗洞宣撫已聽命者二十餘寨並與提
督俞益謨發兵討諸不率命者上命尙書席爾達等率荊州駐防滿洲兵並檄
廣東貴州湖北三省提督會成龍等進攻自龍椒洞至於天星寨分道搜剿斬
悍苗千餘三百餘寨咸聽命受約束苗悉定申喬疏上善後諸事移辰沅道駐
其地上獎征苗諸將貴州提督李芳述功最並褒申喬強毅上南巡申喬朝行
在上以湖南地偏遠官吏私征加耗倍於他省特詔申飭申喬還建上諭碑亭
於通衢示屬吏並疏劾巴陵知縣李可昌等違例苛歛奪官逮治四十五年申
喬疏言清浪平溪二衛地處山僻請改米征銀俾省運費四十六年疏言漕運
旗丁舊有耗贈行月銀米於起運前預發給事中戴嵩條奏俟至通州補發意

在防其虧缺湖南運道遠於江浙例本無耗贈惟恃行月銀米爲轉運之資今既扣存窮丁不能涉遠必致誤漕請仍舊例預發上許之著爲令四十七年命赴湖北按讞荊州同知王侃等侵蝕木稅疏請裁港口渡私稅荊州關稅部差如故申喬還又請以靖州屬鶴麓關稅併入辰州關別疏言營兵給餉每於正月支領時地丁尙未開征挪移則累官預征則累民請以隔歲餘存米石撥給兵餉並下部議行內閣學士宋大業祭告南岳還京師劾申喬輕襲御書詔詰申喬申喬疏辨並言大業初使湖南餽金九千此次再使湖南餽金五百意不慊札布政使董昭祚言南岳廟工餘銀母報部臣仍報部充餉以是誣劾大業坐奪官申喬鑄五級留任四十八年疏劾提督俞益謨取兵糧三十五石詔詰益謨益謨劾申喬苛刻請並解官質訊四十九年上命尙書蕭永藻往按永藻察申喬疏實上爲罷益謨而命申喬還職尋擢左都御史諭曰申喬甚清廉但有性氣人皆畏其直朕察其無私是以護惜之五十年疏請刻頒部行則例劾編修戴名世所著南山集子遺錄有大逆語下刑部鞠實坐斬五十一年疏請

禁營兵冒名食糧又言上普免各省地丁錢糧惟滿關衛大同府征本色不在
蠲例請如奉天臺灣例一體蠲免並允所請又疏言每歲農忙京師當遵例停
訟上諭曰農忙停訟聽之似有理實乃無益民非獨農也商訟則廢生理工訟
則廢手藝地方官不濫准詞狀准則速結訟亦少矣若但四月至七月停訟而
平日濫准詞狀又復何益且此四月至七月間或有姦民詐害良善冤向誰訴
八月以後正當收穫亦非閒時福建廣東四季皆農時豈終歲停訟乎讀書當
明理事有益於民朕即允行否則斷乎不可也五十二年廣東饑命往督平糶
尋授戶部尙書五十三年旗丁請指圈滄州民地直隸巡撫趙宏燮議以旗退
地另撥部議不許申喬言滄州民地有旨停圈宜如宏燮議上從之時方鐫大
錢商人請納銀領易小錢送資源局改鑄命內務府會戶部議申喬言收小錢
有司責也商人圖利恐近藉端擾民不可許而疏已上議准申喬奏請罷斥上
召問狀申喬言司官但送侍郎畫題爲所稅視無顏復居職上曰君子愆忿窒
慾此語宜詳思司官稅視但當奏劾爾性苛急不能容人天地之大德曰生非

但不殺而已蓋於萬物皆養育而保全之爾在官誠廉然豈可恃廉而矯激乎
命任事如故卒用申喬議罷商人納銀領錢申喬子鳳詔官太原知府上幸龍
泉關鳳詔入謁上以申喬子優遇之問巡撫噶禮賢否鳳詔言噶禮清廉第一
上爲擢噶禮江南總督及噶禮以貪敗上舉鳳詔問尙書張鵬翮鵬翮言其貪
五十四年山西巡撫蘇克濟劾鳳詔受賕至三十餘萬命奪官按治申喬疏謝
不能教子請罷斥上責其詞意忿激非大臣體命任事如故鳳詔坐贓罪至死
五十九年以病乞休上仍獎申喬清廉令在官調治鳳詔贓未清命免追並論
大學士謂速傳此旨使其早知庶服藥可效也尋卒年七十有七賜祭塋諡恭
毅雍正元年加贈太子太保六年湖廣總督邁柱疏劾屬吏虧帑有申喬在偏
沅時事例當分償世宗特命免之

論曰宏祚定賦役文然修律例皆爲一代則其績效鉅矣象樞廉直蹇蹇能規
切用事大臣尤言人所難言之獨意主於愛民凡所獻替皆切於民事申喬名
輩差後清介絕流輩慷慨足以任國家之重貞元之際自據亂入昇平開濟匡

襄諸臣與有力焉

清史稿

列傳五十一

郝維訥

任克溥

劉鴻儒

劉健

朱震

張廷樞

郝維訥字敏公直隸霸州人父傑明崇禎進士順治初授行人遷戶部給事中迭疏請開經筵祀闕里廢斥諸臣才堪錄用者量予自新朝賀大典內監不得入班行禮俱下部議行累遷戶部侍郎卒維訥順治四年進士授刑部主事再遷郎中七年出爲福建督糧道僉事師下漳南糧運多阻維訥督米二萬石浮海達泉州以濟軍巨盜張自盛犯延卻徙維訥權延建卻道設方略用間散其黨自盛就擒尋署按察使謝苞苴絕羨耗舉卓異復用孫承澤成克鞏薦十一年召授通政司右參議累遷大理寺卿十三年擢戶部侍郎調吏部十六年丁父憂服闋起戶部侍郎復調吏部康熙三年典會試尋擢左都御史維訥以開國二十餘年南徼初定民困未蘇疏言天下大弊在民窮財盡連年川湖閩廣

雲貴無不增兵增餉本省不支他省協濟臣觀川湖等省尙多曠土若選綠旗及降兵精銳者隸之營伍給以牛種所在屯田則供應減而協濟可以永除閭里無追呼之困又疏言巡按既裁地方巡視責歸督撫督撫任重事繁出巡動踰旬月恐誤公務況騎從衆多經過滋擾至屬官貪廉閭閻疾苦咨訪耳目仍寄司道請嗣後事關重大者仍親身巡察餘概停止又疏言山西山東等省偏旱發帑振濟聖恩至爲優渥特窮鄉僻壤恐難遍及惟蠲免錢糧率土均霑實惠但田有田賦丁有丁差前者被災地方例多免糧不免丁其有丁無田者反不得與有田之戶同霑恩澤請丁銀均如田糧分數蠲免又疏言貪吏罪至死者遇赦免死並免交吏部議處此曹饕餮狼藉未可令其復玷名器貽害地方雖新例赴部另補貪殘所至播虐惟均請敕部定議凡贓款審實者遇赦免罪仍當奪官庶官箴可肅民害可除皆下部議行五年遷工部尙書調刑禮二部八年調戶部疏請停督撫勘災申禁圈取民地並得旨允行十一年調吏部時兵興開捐納正途日壅維訥爲斟酌資格按缺分選銓法稱平十八年給事中

姚絺虞請寬免科道聞風言事之禁下廷臣議維訥謂言官奏事原不禁其風聞但風聞奏參審問全虛者例有處分否則慮有藉風聞挾私報怨者請仍照定例行從之維訥領吏戶二部最久法制多經裁定凡事持大體遇會議會推朝審委曲斟酌期於至當數奏條暢所見與衆偶有同異開陳端緒不留隱情上深重之往往從其言十九年遭母憂服闋詣京師未補官卒諡恭定

任克溥字海眉山東聊城人順治四年進士授南陽府推官卓異行取十三年授吏科給事中疏言上勵精圖治知親民之官莫過守令特擇各府繁劇難治者許三品以上各舉一人破格任用使保舉得當一人賢則一郡安人人賢則各省安太平何難立致乃爲時未久以貪庸効能者已有數人前此保舉不能秉公慎選可知乞敕部察處十四年轉刑科疏言抗糧弊有三宦戶儒戶衙蠹宜分三項各另造冊申報總督巡撫巡按宦欠者題參衿欠者褫革役欠者逮治復疏論順天鄉試給事中陸貽吉與同考官李振鄴張我樸交通行賄竄舉人下吏部都察院嚴鞠貽吉振鄴我樸與居問博士蔡元禧進士項紹芳行賄

舉人田昶郎作霖皆坐斬命禮部覆試不及程者褫奪流徙又二十五人考官庶子曹本榮中允宋之繩並坐降調十五年充會試同考官出闈疏言伏讀上諭令各衙門條奏興利除弊時近兩月僅見宗人府一疏各衙門遲疑觀望竊謂其病有二一則因循既久發論方新恐無以贖往日曠官之咎一則瞻望多端指陳無隱恐無以留後來遷就之門臣子報國止有樸忠遇事直陳稍一轉念便持兩端勢必撻拾瑣屑勦說雷同不能慷慨論列又安望設誠致行乞嚴飭不得浮泛塞責並鑒別當否示以勸懲又疏言近以各衙門胥役作奸犯科詔令諸臣計議指摘臣以爲懲於弊後不若杜於弊先如吏部文選司推升原有定序應先懸榜部門序列姓名資俸薦紀參罰使共見共聞考功司議處條例亦畫一頒發使不得輕重增減至各官開缺以科鈔爲憑向以發鈔後先轉移舞弊如當速問先下刑部與事止奪官巡下吏部者遲速有異應令即日鈔發使不容操縱上以所奏切中時弊下部詳議行轉禮科都給事疏言士爲四民首宜端習尙請敕學臣凡有請託私書許揭送部科差滿定爲上考並令舉

優當訪學行著聞之士懲劣則以抗糧爲最重又疏言錢糧通欠非盡在民臣前奏三款部議分冊申報得旨允行而造冊奏報者惟山西一省耳諸省玩泄從事不肯實心清理徒以開荒增課一時博優敘之榮仍聽其通欠而不之問請飭部察覈又紳衿抗糧定有新條蠹役尤應加嚴並請敕部定例行十七年遷太常寺少卿十八年遭父喪康熙三年起補原官六年疏言朝廷欲薄賦有司反加賦朝廷欲省刑有司反濫刑皆由督撫不得其人今方有詔令部院糾察部院肯糾極貪大惡之督撫一人天下爲督撫者警督撫肯糾極貪大惡之司道一人天下爲司道者警督撫司道廉潔則有司不苦誅求輕徭薄賦政簡刑清自寬然有餘地矣八年應詔陳民生疾苦言小民莫疾於加派莫苦於火耗已敕嚴禁矣此外疾苦尙有數端有司派股戶催糧糧單中多列逃亡絕戶無可徵糧且有糧冊無名按時追比致傾家以償者郵傳供應原有錢糧或侵入私囊貪民養馬應夫或充里長使客往來舟車飲食責令設備河漕附近籍民應役衣敝履決力盡筋疲而工食或至中飽淺夫閭夫賣富差貧一名更至

數十名衙役捕繫恫嚇民被累無窮請敕督撫清釐懲禁上納其言並特諭河工毋得累民尋遷左右通政十四年疏言嘉魚知縣李世錫告湖廣巡撫林天擊索賄以此知餽遺不絕苞苴尙行較世祖朝有司不敢餽遺督撫不敢輕至省會風氣迥殊督撫初受命羣餽焚馬弓矢而爲督撫者亦飾觀瞻趨奢侈一時費累萬上官後爲酬報取價地遂苛索屬吏貽累於民請敕督撫赴官之先屏絕餽送勿鋪張行色以儉養廉督撫參罰科條甚密部院亦當知督撫艱難繁重依例處分毋過爲吹索俾得專心吏治民生無旁顧之憂先後諸疏並下部議行十二年擢刑部侍郎十八年京察以才力不及擬降調命再議改註不謹遂奪官三十八年迎蹕臨清復原銜四十二年南巡還蹕東昌幸其所居園賜松桂堂勝以克溥年將九十賜刑部尙書銜是歲卒賜祭葬乾隆四十七年高宗覽克溥條奏諸疏善之諭克溥逮事兩朝抒誠建白無愧直言譽謬之臣並命錄諸疏宣示

劉鴻儒字魯一直隸遷安人順治三年進士授兵科給事中疏言開國之始首

重安民宜輕賦徭革積弊伏讀恩詔賦制悉依萬厯初年及親順治二年徵數並不減少且復增重請敕有司核實州縣六房書吏初房各二人今則增至七八十人並請敕有司核簡上命指實鴻儒復言臣籍遷安明季丁銀下下二錢下中四錢上地一畝七分有奇民苦輸將猶多逋賦今蒙恩詔蠲免而二年徵數二錢者增至三錢六分四錢者增至七錢二分上地每畝增至八分有奇一邑如此他邑可知乞敕清查蠲免下部確察四年調戶部五年坐糾鉅鹿知縣勞有學失實左遷上林院蕃育署署丞十年命復故官十三年補兵科疏言畿輔近地劫掠時聞請嚴責成謹防捕下部如所請轉戶科十五年疏言開國以來度支屢見不敷汰冗員增權務廣輸納督積通講求開節已無不盡今南服削平萬方底定宜總計財賦之數準其出入定爲經久不易之規請通計一歲內畝賦丁徭鹽徵津稅各省輕齎重運及贖緩事例等項汰其猥瑣無藝者所存金粟若干數然後計一歲內上方供應官吏俸祿兵馬糧料朝祭禮儀修築工役以至師生廩餼胥役代食罷其不經無益者所需金粟若干數務使出入

相合定爲會計之準用財大端惟兵生財本計惟土欲紓國計莫善於屯田朝廷下民屯之令設官置役多糜廩祿得不償失不旋踵而請罷稽古屯制不在民而在兵請敕各省駐兵處所無論邊腹地方察有荒土令兵充種正疆界信賞罰則趨事自力豐種具寬程效則收穫自充此唐初府兵之制也自頃四川貴州已入版圖所得之地必需駐守若令處處興屯則根本自固戰守咸資此又趙充國之於先零杜預之於宛葉確然可循之遺策也順天左右郡縣拱翼王畿根本要地自令舊人圈住深得居重馭輕之意但畿輔之民多失恒業撥補他地皆有繫屬豈能據爲己有今喜峯冷口諸關外大塞以南彌望千里咸稱膏壤請令民願出關開墾者許承爲己業沃土新闢獲利必饒先事有獲趨者自衆數年以後漸次起科成聚成邑堪資保障二者皆軍國大計若設誠致行久之兵食充足國基賴以不拔矣下部議以滇黔未靖兵餉無數難以預定會計設置兵屯及畿輔民出邊墾種敕所司詳勘十七年遷順天府府丞再遷左通政十八年遷太常寺卿康熙三年遷通政使六年擢兵部侍郎十年調戶

部十二年遷左都御史官戶部時甘肅巡撫華善因擅發倉粟賑災戶部循例題參並議罰償鴻儒無異議及官都御史又疏論華善不應參處嗣後封疆大臣有利民之政不宜拘以文法給事成性疏劾下部議坐鴻儒先未異議後又指摘沽名降二級調用尋卒於家

劉健字玉常直隸大城人順治二年進士是歲選新進士十人授給事中健除戶科疏論山東巡撫楊聲遠劾青州道韓昭宜受賄釋叛賊十四人僅令住俸勦賊罰不敵辜昭宜坐奪官四年轉兵科右給事中疏論江南巡撫宋調元薦舉泰州游擊潘延吉寇至棄城走調元濫舉失當亦坐奪官是歲大計健用拾遺例揭山東聊城知縣張守廉贓款下所司勘議守廉以失察吏役得贓罰俸健誣糾坐奪官十年吏科都給事中魏象樞請行大計拾遺因論健枉得旨吏役詐贓知縣僅罰俸言官反坐奪官明有冤抑令吏部察奏命以原官起用授兵科左給事中十一年疏言近畿被水地水落地可耕方春農事急請敕巡撫檄州縣發存留銀借災民籽種俟秋成責償仍飭巡行鄉村勘覈不使吏胥得

緣以爲利十二年疏言鄭成功蹂躪漳泉窺伺省會臣昔充福建考官詢悉地勢福清鎮東衛明時駐兵防倭倘復舊制可以保障長樂藩衛會城宋元設州海壇明以倭患棄之若設將鎮守可與鎮東互爲犄角仙霞嶺爲入福建門戶與江西浙江接壤宜設官控制招民以實其地俾無隙可乘成功數犯京口泊舟平洋沙爲巢穴宜乘其未至移兵駐鎮使退無可據必不敢深入內地疏入敕鎮海將軍石廷柱等分別駐守十三年授山西河東道副使十五年轉河南鹽驛道參議十六年授湖廣按察使就遷右布政十八年總督張長庚巡撫楊茂勳疏薦樞廉幹協濟滇黔兵餉至八百餘萬清逋賦墾地除鼓鑄積弊樞以母憂歸康熙二年起江西布政使吳三桂亂作措餉供兵事辦而民不擾十四年授太常寺卿十六年遷大理寺卿十七年擢副都御史疏言自吳三桂爲亂軍需旁午大計暫停今師所至斬次蕩平伏思兵後殘壞已極正賴賢有司招徠安輯若使不肖用事何以澄吏治奠民生息盜賊請令督撫速行舉劾凡經薦舉者改行易操一體嚴察不得徇下部如所請行又疏言江西當亂後民

逃田城錢糧缺額不急予蠲免逃者不歸歸者復逃荒者未墾墾者仍荒上爲特旨悉行蠲免旋以病乞休諭慰留遣太醫視疾擢吏部侍郎未幾復擢刑部尙書十八年病劇始得請還里至家卒賜祭葬諡端敏朱裴字小晉山西聞喜人亦順治三年進士知直隸易州移河南禹州裴治尙嚴到官即捕殺盜渠縣有諸生聘婦爲盜掠既復自歸盜以奪婦訟生婦以生貧且別娶反爲盜證前政論生死裴廉得實爲榜殺婦而出生於獄擢刑部員外郎遷廣東道御史再遷禮科給事中滿洲俗尙殉葬裴疏請申禁略言泥信幽明未有如此之甚者夫以主命責問奴僕或畏威而不敢不從或懷德而不忍不從二者俱不可爲訓好生惡死人之常情捐軀輕生非盛世所宜有疏入報可累遷工部侍郎以疾乞休歸地震傷於足臥家九年卒

張廷樞字景峰陝西韓城人父順行康熙六年進士官江安督糧道廷樞二十一年進士選庶吉士授編修三十八年以侍讀主江南鄉試四十一年以內閣學士督江南學政四十四年聖祖南巡賜御書冠服四十五年遷吏部侍郎充

經筵講官湖廣容美土司田舜年揭其子昞如貪庸暴戾昞如匿桑植土司向
長庚所不赴勒總督石文晟以聞並劾舜年僭妄命左都御史梅鋗內閣學士
二格會文晟按治舜年詣武昌文晟執之病卒鋗與文晟各具議疏陳二格疏
言佐證未集未可卽定議詔廷樞偕大學士席哈納侍郎蕭永藻覆勘舜年各
款俱虛梅鋗以草率具奏下部議奪官文晟及湖北巡撫劉啟衡偏沅巡撫趙
申喬提督俞益謨各降罰有差四十八年進刑部尙書民張三等盜倉米步軍
統領託合齊逮送刑部滿尙書齊世武擬斬監候廷樞持不可擬充軍下九卿
議廷樞改擬不當當爵俸上責廷樞偏執好勝奪官俄託合齊得罪五十一年
起廷樞工部尙書江南總督噶禮江西巡撫張伯行互訐命尙書張鵬翮總督
赫壽按治議奪伯行官上復命廷樞與尙書穆和倫覆勘如鵬翮等議疏下九
卿上特命奪噶禮官伯行復任五十二年調刑部五十六年河南宜陽知縣張
育徽加徵火耗虐民盜渠亢斑結澠池盜李一臨據神屋聚爲亂並劫永寧知
縣高式青入樂閭鄉盜王更一亦藉知縣白澄豫征錢糧嘯聚圍縣城巡撫張

聖佐總兵馮君洗不能平又匿不以起釁所由入告命廷樞與內閣學士勒什布按治璉自縊更一一臨就禽置之法澄育徽擬絞監候聖佐君洗奪官并追咎原任巡撫李錫令屬吏加徵激變論斬蘭陽白蓮教首袁進等謀不軌命廷樞併按論罪如律五十八年南陽鎮兵爲亂尋知府沈淵命廷樞偕內閣學士高其倬按治浙江巡鹽御史哈爾金受商人賂被劾命廷樞偕內閣學士德音按治并論如法廷樞還京師疏言河南漕米自康熙十四年每石改折銀八錢解部嗣因米賤部議以一錢五分解部餘交巡撫購米起運巡撫分委州縣州縣復派民買輸其爲閭閻累請交糧道購運毋得派累民間下部議行世宗在藩邸優徐采賒傭者箠殺人部議以傭抵廷樞獨議罪在采坐徙邊世宗卽位廢廷樞抗直復逮采論罪雍正元年以原任編修陳夢雷侍誠郡王得罪命發黑龍江廷樞循故事方冬停遣又出其子使治裝尙書隆科多劾廷樞徇縱命鐫五級逐回籍子縉進士官中允亦以告病家居六年陝西巡撫西琳劾廷樞受河督趙世顯贓六千抗追不納縉居鄉不法詔奪廷樞及縉官令所司嚴訊

廷樞被逮道卒總督岳鍾琪議縉當斬籍其家詔特寬免令縉在川陝沿邊修城贖罪乾隆時復廷樞官追諡文端子縉亦進士官戶部主事

論曰維納論貪吏遇赦不得遽復官克溥言民生疾苦戒加賦濫刑鴻儒請定歲會之制擬議兵後當復行計典裴請罰殉葬益於國澤於民言各有所當也廷樞使車四出惟張伯行事出上裁他皆稱指律嚴科場罪所以重取士乃草野私議輒以爲過甚克溥興丁酉順天之獄卒以不謹罷殆怨家所中歟廷樞得罪似亦有辭之者詘而後申足爲養直者勸矣

清史稿

列傳五十二

湯斌

號之樵

陸隨其

張伯行

字師魯

湯斌字孔伯河南睢州人明末流賊陷睢州母趙殉節死事具明史列女傳父契祖挈斌避兵浙江衢州順治二年奉父還里九年成進士選庶吉士授國史院檢討方議修明史斌應詔言宋史修於元至正而不諱文天祥謝枋得之忠元史修於明洪武而亦著丁好禮巴顏布哈之義順治元二年間前明諸臣有抗節不屈臨危致命者不可概以叛書宜命纂修諸臣勿事瞻顧下所司大學士馮銓金之俊謂斌獎逆擬旨嚴飭世祖特召至南苑慰諭之時府道多缺員上以用人方亟當得文行兼優者以學問爲經濟選翰林官得陳爌黃志遴王無咎楊思聖藍潤王舜年范周馬燁曾沈荃及斌凡十人斌出爲潼關道副使時方用兵關中征發四至總兵陳德調湖南將二萬人至關欲留斌以計出之至洛陽譚漬十六年調江西嶺北道明將李王廷率所部萬人據雩都山寨約

降未及期而鄭成功犯江甯斌策玉廷必變計夜馳至南安設守玉廷以兵至見有備卻走遣將追擊獲玉廷斌念父老以病乞休丁父憂服闋聞容城孫奇遇講學夏峰負笈往從康熙十七年詔舉博學鴻儒尙書魏象樞副都御史金鉉以斌薦試一等授翰林院侍講與修明史二十年充日講起居注官浙江鄉試正考官轉侍讀二十一年命爲明史總裁官遷左庶子二十三年擢內閣學士江甯巡撫缺方廷推上曰今以道學名者言行或相悖朕聞湯斌從孫奇遇學有操守可補江甯巡撫瀕行諭曰居官以正風俗爲先江蘇習尙華侈其加意化導非旦夕事必從容漸摩使之改心易慮賜鞍馬一表裏十銀五百復賜御書三軸曰今當遠離展此如對朕也十月上南巡至蘇州諭斌曰向聞吳閭繁盛今觀其風土尙虛華安佚樂逐末者多力田者寡爾當使之去奢返樸事事務本庶幾可挽頽風上還蹕斌從至江甯命還蘇州賜御書及狐腋蟒服初余國柱爲江甯巡撫淮揚二府被水國柱疏言水退田可耕明年當徵賦斌遣覆勘水未退卽田出水處猶未可耕奏寢前議二十四年疏言江蘇賦稅甲天

下每歲本折五六百萬上命分年帶徵漕欠而地丁錢糧自康熙十八年至二十二年五年並徵州縣比較十日一限使每日輸比則十日中午空閒七日赴比民知剋補無術捩皮骨以捱徵比官知催科計窮捩降革以圖卸擔懇將民欠地丁錢糧照漕項一例於康熙二十四年起分年帶徵又疏言蘇松土隘人稠而條銀漕白正耗以及白糧經費漕賸五米十銀雜項差徭不可勝計區區兩府田不加廣而當大省百餘州縣之賦民力日絀順治初錢糧起存相半考成之例尙寬後因兵餉急迫起解數多又定十分考成之例一分不完難追部議官吏顧惜功名必多苟且參罰期迫則以欠作完賠補維艱又以完爲欠百姓脂膏已竭有司智勇俱困積欠年久惟恃恩蠲然與其赦免於追呼既窮之後何若酌減於徵比未加之先懇將蘇松錢糧各照科則量減一二成定適中可完之實數再將科則稍加歸併使簡易明白便於稽覈又請蠲蘇松等七府州十三年至十七年未完銀米淮揚二府十八九兩年災欠及邳州版荒宿遷九釐地畝款項並失額丁糧皆下部議行九釐地畝款項即明萬厯後暫加

三餉宿遷派銀四千三百有奇至是始得蠲免准揚徐三府復水斌條列蠲賑事宜請發帑五萬糴米湖廣不俟詔下卽行咨請漕運總督徐旭齡河道總督靳輔分賑淮安斌赴清河桃源宿遷邳豐諸州縣察賑疏聞上命侍郎素赫助之先後奏劾知府趙祿星張萬壽知縣陳協濬蔡司需盧繼葛之英劉濤劉茂位等常州知府祖進朝以失察屬吏降調斌察其廉奏留之又疏薦吳縣知縣劉滋吳江知縣郭琇廉能最著而徵收錢糧未能十分全完請予行取下部皆議駁特旨允行斌令諸州縣立社學講孝經小學修泰伯祠及宋范仲淹明周順昌祠禁婦女游觀胥吏倡優毋得衣裘帛煨淫詞小說革火葬蘇州城西上方山有五通神祠幾數百年遠近奔走如鶖諺謂其山曰肉山其下石湖曰酒海少婦病巫輒言五通將娶爲婦往往瘞死斌收其偶像木者焚之土者沈之並飭諸州縣有類此者悉毀之撤其材修學宮教化大行民皆悅服方明珠用事國柱附之布政使襲其旋坐貪爲御史陸隴其所劾因國柱賄明珠得緩國柱更欲爲斌言以斌嚴正不得發及蜀江南賦國柱使人語斌謂皆明珠力江

南人宜有以報之索昧斌不應比大計外吏輦金於明珠門者不絕而斌屬吏獨無二十五年上爲太子擇輔導臣廷臣有舉斌者詔曰自古帝王諭教太子必簡和平謹恪之臣統率官僚專資輔翼湯斌在講筵時素行謹慎朕所稔知及簡任巡撫潔已率屬實心任事允宜拔擢以風有位授禮部尙書管詹事府事將行吳民泣留不得罷市三日遮道焚香送之初靳輔與按察使于成龍爭論下河事久未決廷臣阿明珠意多右輔命尙書薩穆哈穆成額會斌勘議斌主濬下河如成龍言薩穆哈等還京師不以斌語聞斌至上問斌斌以實對薩穆哈等坐罷去二十六年五月不雨靈臺郎董漢臣上書指斥時事語侵執政下廷議明珠惶懼將引罪大學士王熙獨曰市兒妄語立斬之事畢矣斌後至國柱以告斌曰漢臣應詔言事無死法大臣不言而小臣言之吾輩當自省上卒免漢臣罪明珠國柱愈恚摘其語上聞並摭斌在蘇時文告語曰愛民有心救民無術以爲謗訕傳旨詰問斌惟自陳資性愚昧愆過叢集乞賜嚴加處分左都御史瓊丹王鴻緒等又連疏劾斌會斌先薦候補道耿介爲少詹事同輔

太子介以老疾乞休詹事尹泰等劾介僥倖求去且及斌妄薦議奪斌官上獨留斌任國柱宣言上將隸斌旗籍斌適扶病入朝道路相傳聞者皆泣下江南人客都下者將擊登聞鼓訟冤繼知無其事乃散九月改工部尚書未幾疾作遣太醫診視十月自通州勘貢木歸一夕卒年六十一斌既卒上嘗語廷臣曰朕遇湯斌不薄而怨訕不休何也明珠國柱輩嫉斌甚微上厚斌斌禍且不測斌既師奇逢習宋諸儒書嘗言滯事物以窮理沈溺迹象既支離而無本離事物而致知墮聰黜明亦虛空而鮮實其教人以爲必先明義利之界謹誠偽之關爲眞經學眞道學否則講論踐履析爲二事世道何賴斌篤守程朱亦不薄王守仁身體力行不尙講論所詣深粹著有洛學編潛庵語錄雍正中入賢良祠乾隆元年謚文正道光二年從祀孔子廟孫之旭字孟升康熙四十五年進士官編修改御史出爲霸昌道內遷左通政所至皆有聲

陸隴其初名龍其字稼書浙江平湖人康熙九年進士十四年授江南嘉定知縣嘉定大縣賦多俗侈隴其守約持儉務以德化民或父訟子泣而諭之子掖

父歸而善事焉弟訟兄察導訟者杖之兄弟皆感悔惡少以其徒爲暴校於衢視其悔而釋之豪家僕奪負薪者妻發吏捕治之豪折節爲善人訟不以吏胥逮民有宗族爭者以族長有鄉里爭者以里老又或使兩造相要俱至謂之自追徵糧立挂比法書其名以俟比及數者自歸立甘限法令以今限所不足倍輸於後十五年以軍興徵餉隴其下令謂不戀一官顧無益於爾民而有害於急公戶予一名刺勸諭之不匝月輸至十萬會行間架稅隨其謂當止於市肆令母及村舍江甯巡撫慕天顏請行州縣繁簡更調法因言嘉定政繁多通賦隨其操守稱絕一塵才幹乃非肆應宜調簡縣疏下部議坐才力不及降調縣民道爲盜所殺而訟其讐隴其獲盜定讞部議初報不言盜坐諱盜奪官十七年舉博學鴻儒未及試丁父憂歸十八年左都御史魏象樞應詔舉清廉官疏薦隴其潔已愛民去官日惟圖書數卷及其妻織機一具民愛之比於父母命服闋以知縣用二十二年授直隸靈壽知縣靈壽土瘠民貧役繁而俗薄隴其請於上官與鄰縣更迭應役俾得番代行鄉約察保甲多爲文告反覆曉譬務

去嗣很輕生之習二十三年直隸巡撫格爾古德以隴其與兗州知府張鵬翮同舉清廉官二十九年詔九卿舉學問優長品行可用者隴其復被薦得旨行取隴其在靈壽七年去官日民遮道號泣如去嘉定時授四川道監察御史偏沅巡撫于養志有父喪總督請在任守制隴其言天下承平湖廣非用兵地宜以孝教養志解任三十年師征噶爾丹行捐納事例御史陳菁請罷捐免保舉而增應升先用部議未行隴其疏言捐納非上所欲行若許捐免保舉則與正途無異且是清廉可捐納而得也至捐納先用開奔競之途皆不可行更請捐納之員三年無保舉即予休致以清仕途九卿議謂若行休致則求保者奔競益甚詔再與菁詳議隴其又言捐納賢愚錯雜惟恃保舉以防其弊若併此而可捐納此輩有不捐納者乎議者或謂三年無保舉卽令休致爲太刻此輩白丁得官踞民上者三年亦已甚矣休致在家儼然指紳爲榮多矣若云營求保舉督撫而賢何由奔競卽不賢亦不能盡人而保舉之也詞益激切菁與九卿復持異議戶部以捐生觀望遲誤軍需請奪隴其官發奉天安置上曰隴其居

官未久不察事情誠宜處分但言官可貸會順天府尹衛既齊巡畿輔還奏民心皇皇恐隴其遠謫遂得免尋命巡視北城試俸滿部議調外因假歸三十一年卒三十三年江南學政缺上欲用隴其侍臣奏隴其已卒乃用邵嗣堯嗣堯故與隴其同以清廉行取者也雍正二年世宗臨雍議增從祀諸儒隴其與焉乾隆元年特設清獻加贈內閣學士兼禮部侍郎著有困勉錄松陽講義三魚堂文集其爲學專宗朱子撰學術辨大指謂王守仁以禪而託於儒高攀龍顧憲成知闢守仁而以靜坐爲主本原之地不出守仁範圍詆斥之甚力爲縣崇實政嘉定民頌隴其迄清季未已靈壽鄰縣阜平爲置冢民陸氏世守焉自號隴其子孫

張伯行字孝先河南儀封人康熙二十四年進士授內閣中書改中書科中書丁父憂歸建請見書院講明正學儀封城北舊有隄三十八年六月大雨潰伯行募民囊土塞之河道總督張鵬瀚行河疏薦堪理河務命以原銜赴河工督修黃河南岸隄二百餘里及馬家港東壩高家堰諸工四十二年授山東濟

甯道值歲饑卽家運錢米並製棉衣拯民飢寒上命分道治賑伯行賑汝上陽穀二縣發倉穀二萬二千六百石有奇布政使責其專擅卽論劾伯行曰有旨治賑不得爲專擅上視民如傷倉穀重乎人命重乎乃得寢四十五年上南巡賜布澤安流榜尋遷江蘇按察使四十六年復南巡至蘇州諭從臣曰朕聞張伯行居官甚清最不易得時命所在督撫舉賢能官伯行不與上見伯行曰朕久識汝朕自舉之他日居官而善天下以朕爲知人擢福建巡撫賜廉惠宣猷榜伯行疏請免臺灣鳳山諸羅三縣荒賦福建米貴請發帑五萬市湖廣江西廣東米平糴建甌峯書院置學舍出所藏書搜先儒文集刊布爲正誼堂叢書以教諸生福州民祀瘟神命毀其偶像改祠爲義塾祀朱子俗多尼鬻貧家女髡之至千百伯行命其家贖還擇偶貧不能贖官爲出之四十八年調江蘇巡撫賑淮揚徐三府饑會布政使宜思恭以司庫虧空爲總督噶禮劾罷上遣尙書張鵬翮按治陳鵬年以蘇州知府署布政使議司庫虧三十四萬分扣官俸役食抵補伯行咨噶禮會題不應伯行疏上聞上命鵬翮并按別疏陳噶禮異

議狀上諭廷臣曰覽伯行此疏知與噶禮不和爲人臣者當以國事爲重朕綜理機務垂五十年未嘗令一人得逞其私此疏宜置不問伯行諄乞病上不許鵬翮請責前任巡撫于準及思恭償十六萬餘以官俸役食抵補上曰江南虧空錢糧非官吏侵蝕朕南巡時督撫肆意挪用而不敢言若責新任官袖償朕心實有不忍命察明南巡時用款具奏伯行又疏奏各府州縣無著錢糧十萬八千上命併予豁免噶禮貪橫伯行與之迕五十年江南鄉試副考官趙晉交通關節榜發士論譁然輿財神入學宮伯行疏上其事正考官左必蕃亦以實聞命尙書張鵬翮侍郎赫壽按治伯行與噶禮會鞫得舉人吳泌程光奎通賄狀詞連噶禮伯行請解噶禮任付嚴審噶禮不自安亦摺伯行七罪訐奏上命俱解任鵬翮等尋奏旨與泌光奎通賄俱實擬罪如律噶禮交通事誣伯行應奪官上切責鵬翮等掩飾更命尙書穆和倫張廷樞覆按仍如前議上曰伯行居官清正天下所知噶禮才雖有餘而喜生事無清正名此議是非顛倒命九卿詹事科道再議明日召九卿等諭曰伯行居官清廉噶禮操守朕不能信若

無伯行則江南必受其股削幾半矣此互參一案初遣官往審爲噶禮所制致不能得其情再遣官往審與前無異爾等能體朕保全清官之意使正人無所疑懼則海宇昇平矣遂奪噶禮官命伯行復任五十二年江蘇布政使缺員伯行疏薦福建布政使李發甲臺灣道陳瓚前祭酒余正健上已以湖北按察使牟欽元擢任未幾伯行劾欽元匿通海罪人張令濤署中請逮治令濤兄元隆居上海造海船出入海洋擁厚資結納豪貴會部檄搜緝海賊鄭盡心餘黨崇明水師捕漁船其舟人福建產冒華亭籍驗船照爲元隆所代領伯行欲窮治是時令濤在噶禮幕元隆稱病不就逮獄未竟而死於家噶禮前劾伯行因據其事爲七罪之一會上海縣民顧協一訴令濤據其房屋別有水寨數處窩藏海賊稱令濤今居欽元署中上命總督赫壽察審赫壽庇令濤以通賊無證聞復命鵬翮及副都御史阿錫鼎按其事鵬翮等奏元隆令濤皆良民請奪伯行官上命復審且命伯行自陳伯行疏言元隆通賊雖報身故而金多黨衆人人可以冒名處處可以領照令濤乃顧協一首告若其不實例應坐誣欽元庇匿

致案久懸臣爲地方大吏杜漸防微豈得不究既命解任鵬瀚等仍以伯行誣陷良民挾詐欺公論斬法司議如所擬上免其罪命伯行來京旋入直南書房署倉場侍郎充順天鄉試正考官授戶部侍郎兼管錢法倉場再充會試副考官雍正元年擢禮部尙書賜禮樂名臣榜二年命赴闕里祭崇聖祠三年卒年七十五遺疏請崇正學勵直臣上軫悼贈太子太保諡清恪光緒初從祀文廟伯行方成進士歸構精舍於南郊陳書數千卷縱觀之及小學近思錄程朱語類曰入聖門庭在是矣盡發濂洛關閩諸大儒之書口誦手抄者七年始赴官嘗曰千聖之學括於一敬故學莫先於主敬因自號曰敬庵又曰君子喻於義小人喻於利老氏貪生佛者畏死烈士徇名皆利也在官所引皆學問醇正志操潔清初不令知平日齟齬之者復與共事推誠協恭無絲毫芥蒂曰已荷保全敢以私廢公平所著有困學錄續錄正誼堂文集居濟一得諸書子師載字又渠舉人以父廢補戶部員外郎雍正初授揚州知府歲饑高郵湖西民以縣吏報災輕不得賑師載行部見饑民滿道不待報而賑之江都芒稻閘爲淮黃

高寶諸河入江要津夏潦盛漲閘官利商人餌謂非運使令不得啓師載詢鹽艘須水六七尺今過半乃身往督役啟閘其後芒稻閘屬府啟閉遂以爲例累遷江蘇按察使內擢右通政再遷授倉場侍郎命協辦江南河務授安徽巡撫仍命赴南河協同防護會河溢奪官上命誅疏防同知李焯守備張寶使師載視行刑畢釋之再起爲兵部侍郎遷漕運總督復授河東河道總督師載長於治河少讀父書研性理之學高宗稱其篤實卒贈太子太保諡愷敬

論曰清世以名臣從祀孔子廟斌隨其伯行三人而已皆以外吏起家蒙聖祖恩遇隴其官止御史而廉能清正民愛之如父母與斌伯行如一其不爲時所容而爲聖祖所愛護也亦如一君明而臣良漢唐以後蓋亦罕矣斌不薄王守仁隴其篤守程朱斥守仁甚峻而伯行繼之要其躬行實踐施於政事皆能無負其所學雖趨嚮稍有廣隘亦無所軒輊焉

清史稿

列傳五十三

葉方藹

沈荃

勵杜訥

字宗經
吳興

徐元珙

許三禮

王士禎

韓茨

湯右曾

葉方藹字子吉江南崑山人順治十二年一甲三名進士授編修江南奏銷案起坐奪官尋授上林苑蕃育署丞事白還故官康熙十二年充日講起居注官十四年遷國子監司業再遷侍講宴瀛臺羣臣皆進詩賦方藹製八箴以獻上甚悅命撰太極圖論以進賜貂裘文綺十五年遷左庶子再遷侍講學士十六年命充孝經衍義總裁進講通鑑上問諸葛亮何如伊尹方藹對曰伊尹聖人可比孔子諸葛亮大賢可比顏淵上首肯講中庸上問知行孰重對曰宋臣朱熹之說以次序言則知先行後以功夫言則知輕行重上曰畢竟行重若不能行知亦虛知耳轉侍讀學士十七年充鑑古輯覽皇輿表總裁經筵講官直南

書房上勤於典學故事以大臣二人日直上特以屬方藹兼掌院學士兼禮部侍郎十七年召試博學宏詞命方藹閱卷總裁明史十九年尙書講義成上以講幄勞加方藹尙書銜上講易噬嗑卦辭方藹與同官庫勒納進所撰乾坤二卦總論上覽竟諭曰卦爻義各有不同卽如噬嗑卦中四爻主用刑者言初上二爻主受刑者言必得總論發揮庶全卦之義了然諸卦可依此撰進二十年授刑部侍郎二十一年卒遺奠茶酒賜白金二百上以方藹久侍講幄啟沃勤勞命優卹賜諡文敏方藹初釋褐以文章受知世祖家居時有密陳其居鄉不法者下其事江蘇巡撫田雯覈覆雯以鄉評入告上曰朕固知方藹不如是也其後事聖祖直內廷眷遇優渥方藹故廉謹其卒以板扉爲臥榻支以四氍布帳多補綴無以爲斂見者以爲難能

沈荃字貞蕤江南華亭人順治九年一甲三名進士授編修世祖擇翰林官外轉荃出爲大梁道副使劇盜董天祿牛光天剽掠許額間荃督兵捕治殲其渠羣盜皆散去禹州盜倚竹園爲巢殺人越貨荃遣吏卒收捕發土得尸十餘悉

按誅之尋署按察使疏言師方南征必經南陽汝寧諸府供應疲苦亢村郭店諸驛官死夫逃請敕均撥驛站銀兩師既入楚留馬彭德役民飼秣請敕以懷慶衛輝廣平順德大名諸府更番分駐各縣常平倉蓄穀太寡請敕定額大縣五六百石小縣三四百石開封自河決後城垣淤圯官吏分駐各邑鄉閭暫移輝縣近奉旨修復汴城請敕籌撥錢糧督倡興工河南土地原有上中下等則向因疆井混淆一例派糧今查勘漸定請敕視萬歷年間則例照地派糧河南兵額一萬二千奉旨缺額免補有汰無增駐防分州每苦不足請敕仍許募補足額俱下部議行康熙元年以憂歸六年授直隸通薊道坐事左邊九年授浙江寧波同知未上官特旨召對命作各體書稱旨詔以原品內用十年授侍講直南書房十一年轉侍讀十二年充日講起居注官十三年擢國子監祭酒十五年遷少詹事十六年擢詹事十八年早求直言時更定新例罪人當流者徒烏喇下廷臣議荃謂烏喇去蒙古三四千里地極寒人畜多凍死今罪不至死者乃遣流而更驅之死地宜如舊例便疏上有旨令畫一荃持前議益堅且曰

此議行三日不兩者甘服欺罔罪上改容納之越二日天竟兩例得能十九年上以講幄勞加荃禮部侍郎銜二十一年正月乾清宮宴廷臣賦柏梁體詩荃與焉二十三年卒上以荃貧賜白金五百子宗敬二十七年進士改庶吉士以編修入直上命作書因諭大學士李光地曰朕初學書宗敬父荃指陳得失至今作字未嘗不思其勤也宗敬官至太常寺少卿

勵杜訥字近公直隸靜海人勵氏自鎮海北遷訥以杜姓補諸生康熙二年纂世祖實錄選善書之士訥試第一赴館繕錄書成敘勞授福建福甯州同命留直南書房食六品俸十九年授編修充日講起居注官二十一年奏請復勵姓聖祖方閱通鑑綱目杜訥與學士張英侍閱竟杜訥請以御批宣示史館下禮部翰林院會議如所請二十七年遷贊善二十九年遷侍講改光祿寺少卿三十六年遷通政司參議三十七年遷太僕寺卿再遷宗人府府丞三十九年遷左副都御史疏言督撫大吏朝廷畀以百餘城吏治數千里民生責任至重若託詞靜鎮漸成悠悠不過以期會簿書忝封疆之寄請敕各督撫年終彙奏若

何察吏安民興利除弊以備清覽不實則治以欺罔之罪庶時時警勉不敢優游草率貽誤地方藩司專掌錢穀臬司專掌刑名州縣之錢糧有無虧空定案之爰書有無駁審詳實并列則藩臬之優劣亦無遁情議如所請又言提鎮保送將弁時有騎射甚劣並年老之員經特旨甄別典戎要務首在考察將弁請敕部將各提鎮所屬引見不稱旨之員彙冊呈覽並定處分下詔所司飭行四十二年擢刑部侍郎卒杜訥學行醇粹直禁廷二十餘年無纖芥過失四十四年上駐蹕靜海敕獎杜訥謹慎勤勞親定諡曰文恪手書賜其家雍正元年贈禮部尚書八年祀賢良祠高宗卽位加贈太子太傅子廷儀字南湖康熙三十九年進士改庶吉士四十一年特命直南書房四十三年授編修遭父喪既終充日講起居注官累遷內閣學士充經筵講官擢翰林院掌院學士兵部侍郎雍正元年遷刑部尚書疏言各省常平倉穀當責督撫覈實盤查年終冊報又請於古北口外設理事同知檢察命盜獄並從之二年疏言各州縣團練民壯當選習槍箭勤加訓練上聽之下直省督撫實力奉行又疏請分立內外監內

監居要犯外監居輕犯別爲女監另牆隔別均報可迭疏論監生攷職禁止私鹽清查入官家產各舉其叢弊所在並下部議行七年加太子太傅賜矜慎平恕榜九年調吏部仍專管刑部事十年卒諡文恭子宗萬字滋大康熙六十年進士改庶吉士授編修雍正二年命直南書房充日講起居注官督山西學政六年遷國子監司業按試潞安臨晉民解進朝詐稱御前總管私書請託宗萬疏發之諭嘉獎遷侍讀命巡察山西八年巡撫石麟劾宗萬擾驛遞並縱僕受賕坐奪官十年起鴻臚寺少卿仍直南書房四遷至禮部侍郎調刑部乾隆元年吏部劾宗萬保舉河員受請託坐奪官尋命直武英殿七年再起侍講學士累遷通政使直懋勤殿纂秘殿珠林遷左副都御史擢工部侍郎調刑部十年坐縱門客生事復奪官手詔詰責命還里閉戶讀書督撫那蘇圖劾宗萬縱弟占官地命承修固安城工免其罪十六年復起侍講學士累遷光祿寺卿二十四年卒子守謙嘉慶十年進士官編修自杜訥以諸生受知遇子孫繼起四世皆入翰林

徐元珙字輯五江南武進人順治十二年進士授刑部主事遷員外郎典廣西
試選郎中出爲福建建寧道僉事善治盜移山西冀甯南道參議遭母憂去康
熙十二年起直隸口北道參議時宣鎮未設府縣但置同知分防元珙和調將
士嚴斥堠增亭障葺城郭修學舍邊境晏然入爲光祿寺少卿歷太僕寺卿通
政使二十四年授太常寺卿疏請釐正北郊配饗位次略言本朝分祭南北郊
闕邱南鄉三聖並配甚鉅典也獨方澤配位臣不能無議昭穆之位分左右不
分東西闕邱南鄉則東爲左爲昭西爲右爲穆地祇既北鄉則西爲左爲昭東
爲右爲穆蓋東西有定方而左右無定位從正位所鄉而殊漢唐地祇皆南鄉
至宋政和四年引北闕答陰之義始改北鄉配位亦改焉明嘉靖九年建方澤
壇因宋制地祇北鄉而配位仍設於東不應古禮蓋其時禮官誤執以東爲左
因循至今然明配位止一太祖或左或右尙無越次之嫌今三聖並配左右易
位因之昭穆失序況配位誤則從壇皆誤即陵山從祀嶽鎮者亦誤揆諸典禮
實有未安有待釐正疏入下廷臣集議學士徐乾學韓爌皆題元珙議獨許三

禮駁之遂不行語見三禮傳二十五年遷左副都御史疏請正北海祀典略言唐望祭洛州卽今河南府宋望祭孟州卽今懷慶府明依宋制說者謂懷慶屬濟源潛通北海故於此望祭焉本朝定制東海祀萊州南海祀廣州西海祀蒲州皆爲允當獨北海仍祀懷慶竊以嶽鎮方位當準皇都往南祭北於義未愜謹按北鎮醫巫閭山在今奉天府境山旣爲北鎮川卽可爲北海矧長白山水黑龍鴨綠諸江悉朝宗於海請更定北海之祭就北鎮醫巫閭爲便或疑歷時已久不可輒更臣按北嶽祀恒山曲陽積二千餘年用科臣言改祀渾源州嶽祭可更何疑海祭疏入議行二十六年疏乞歸養至家父已前卒二十七年孝莊文皇后崩赴闕哭臨疾作卒於京師上聞而憫之喪歸許馳驛卹如禮元珙尙風義座主陳彩沒妻妾繼逝撫其一歲孤並其女爲營婚嫁與己子無異時論推其篤厚彩字美公廣東順德人順治九年進士自編修出爲江南常鎮道康熙初江南有大獄諸生連染被逮彩以輕刑全活之甚衆

許三禮字典三河南安陽人順治十八年進士授浙江海甯知縣海甯地瀕海

多盜三禮練鄉勇嚴保甲禽盜首朱續之等益修城壕築土城尖山鳳凰山間
成以土兵築塘濬河救災儲粟教民以務本立書院延黃宗羲主講在縣八年
聲譽甚美康熙八年行取授福建道御史疏言漢儒董仲舒表章六經其言道
之大原出於天與禪宗異學專主明心者不同故宋儒程顥有儒道本天釋教
本心之辨宜視宋時六大儒從祀國學進稱先賢下廷臣議不果行時雲貴猶
未定三禮疏言蕩平後察大吏宜嚴蘇民困宜寬尋命巡視北城太常寺卿徐
元拱議北郊配位應改坐西嚮東下廷臣集議三禮曰陽生於子極於巳故祀
天在冬至位南郊南嚮陰生於午極於亥故祀地在夏至位北郊北嚮陰答
陽義各有取配位者主道也義在近尊者爲上故配天尙左配地尙右並居東
改之非是從之尋疏請定武臣守制例下廷臣集議有謂本朝無此例者三禮
曰宋高宗紹興七年岳飛聞母訃解兵柄徒步歸廬山廬墓三年此往代守制
例也遂定議武臣守制自此始旋擢通政司右參議二十七年遷提督四譯館
太常寺少卿再遷大理寺卿召對便殿上曰河圖洛書道治之原一二三四五

六七八九十忽金火易位何也對曰此即一陰一陽之道也大地大德曰生故河圖左旋而相生爲順數洛書右轉而相尅爲逆數一順一逆位所由易也上曰既順何以逆對曰孤陽不生獨陰不成河圖自北而東順以相生木火土金水就流行言洛書自北而西逆則相尅上下四方中就對待言既五數在中縱橫皆十五矣惟尅乃所以生也陰陽交則生變變則生生不易上又問曰洪範九疇皇建有極謂人參三才此說是乎對曰自天地開闢以來賴有聖人願治而不願亂者天地之心有治而不能無亂者天地之數數至則生聖人撥亂而返之治裁成輔相以左右民則聖人建極會極歸極之功也聖人既能撥亂而返之治始副天地長治之心此人參三才之說實理也亦實事也上頗嘉美之遷順天府府尹二十八年遷右副都御史再遷兵部督捕侍郎以病告歸未及行卒三禮初師事孫奇逢及在海寧從黃宗羲游官京師有所疑必貽書質宗羲數宋趙抃故事且畫所爲夜焚香告天家居及在海甯皆建告天樓聖祖重道學嘗以之稱三禮云

王士禎字貽上山東新城人幼慧卽能詩舉於鄉年十八順治十二年成進士授江南揚州推官侍郎葉成格被命駐江甯按治通海寇獄株連衆士禎駭反坐寬無辜所全活甚多揚州饑買通課數萬逮繫久不能償士禎募款代輸之事乃解康熙三年總督郎廷佐巡撫張尙賢河督朱之錫交章論薦內擢禮部主事累遷戶部郎中十一年典四川試母憂歸服闋起故官上留意文學嘗從容問大學士李蔚今世博學善詩文者孰最蔚以士禎對復問馮溥陳廷敬張英皆如蔚言召士禎入對懋勤殿賦詩稱旨改翰林院侍講遷侍讀入直南書房漢臣自部曹改詞臣自士禎始上徵其詩錄上三百篇曰御覽集尋遷國子監祭酒整條教屏餽遺獎拔皆知名士與司業劉芳喆疏言漢唐以來以太牢祀孔子加王號尊以八佾十二簋豆至明嘉靖間用張璁議改爲中祀失尊崇之意禮祭從生者天子祀其師當用天子之禮樂又疏言自明去十哲封爵稱冉子者凡三未有辨別宋周敦頤等六子改稱先賢位漢唐諸儒之上世次殊有未安宜予釐定又疏言田何受易商瞿有功聖學宜增祀鄭康成注經百餘

萬言史稱純儒宜復祀又疏言明儒曹端章懋蔡清呂柟羅洪先並宜從祀絳州貢生辛全生際明末以正學爲己任著述甚富乞敕進遺書又請修監藏經史舊版疏並下部議以籀豆樂舞名號位次俟會典頒發遵循增祀明儒及徵進遺書俟明史告成覈定修補南北監經史版如所請行二十三年遷少詹事命祭告南海父憂歸二十九年起原官再遷兵部督捕侍郎三十一年調戶部命祭告西嶽西鎮江濱三十七年遷左都御史會廷議省御史員額士禎曰國初設御史六十後減爲四十又減爲二十四天子耳目官可增不可減卒從士禎議遷刑部尙書故事斷獄下九卿平議士禎官副都御史爭楊成獄得減等官戶部侍郎爭太平王訓聊城於相元齊河房得亮獄皆得減等而衡陽左道蕭儒英則又爭而寘之法徐起龍爲曹氏所誣則釋起龍而罪曹案其所與私者皆服罪及長刑部河南閻煥山山西郭振羽廣西寶子章皆以救父殺人論重辟士禎曰此當論其救父與否不當以挺刃定輕重改緩決入奏報可士禎以詩受知聖祖被眷遇甚隆四十年乞假還墓上命予假五月事畢還朝四十

三年坐王五吳謙獄罷王五故工部匠役捐納通判謙太醫院官坐索債毆斃
負債者下刑部擬王五流徙謙免議士禎謂輕重懸殊改王五但奪官復下三
法司嚴鞫王五及謙並論死又發謙屬託刑部主事馬世泰狀士禎以瞻徇奪
官四十九年上眷念諸舊臣詔復職五十年卒明季文敏諸言詩者習袁宗道
兄弟則失之俚俗宗鍾惺譚友夏則失之纖仄數陳子龍李雯軌轍正矣則又
失之膚廓士禎姿稟既高學問極博與兄士祿士祐並致力於詩獨以神韻爲
宗取司空圖所謂味在酸鹹外嚴羽所謂羚羊掛角無迹可尋標示指趣自號
漁洋山人主持風雅數十年同時趙執信始與立異言詩中當有人在旣沒或
詆其才弱然終不失爲正宗也士禎初名士禎卒後以避世宗諱追改士正乾
隆三十年高宗與沈德潛論詩及士正諡曰士正續學士詩在本朝諸家中流
派較正宜示襲爲稽古者勸因追諡文簡二十九年復諡曰士正名以避廟諱
致改字與原名不相近流傳日久後世幾不復知爲何人今改爲士禎庶與弟
兄行派不致淆亂各館書籍記載一體照改

韓英字元少江南長洲人讀書通五經恬曠好山水朋游飲酒歡諧終日而制行清嚴特工制舉文應順天鄉試尙書徐乾學拔之遺卷中康熙十二年會試殿試皆第一授修撰充日講起居注官聖祖知其能文命撰太極圖說以進復諭進所作制舉文召入弘德殿講大學世祖命纂孝經衍義未成以英專任纂修十四年典順天試十五年遷贊善十六年遷侍講十七年復典順天試十八年乞假歸二十三年起故官尋轉侍讀二十四年上親試翰林英列第二遷侍講學士尋擢內閣學士二十六年再假歸築室西山點勘諸經注疏旁逮諸史居八年三十四年召至京命以原官總裁一統志遷禮部侍郎兼掌院學士祭酒阿理瑚請以故大學士達海從祀文廟下部議英謂從祀鉅典論定匪易達海造國書一藝耳持不可永定河工開事例戶部請推廣得捐納道府英謂道府不當捐納御史鄭維孜疏言國子監生多江浙人有冒籍赴試者請盡發原籍肄業英曰京師首善地遠人嚮化方且聞風慕義而來若因一二不肖輒更定制悉爲驅除太學且空非國體維孜言非是事得寢三十九年充經筵講官

授禮部尙書教習庶吉士四十一年上疏乞解職專意纂輯承修諸書詔慰留之並賜篤志經學潤色鴻業榜四十二年再稱疾上不悅敕仍留原任四十三年再疏乞退仍不允是歲秋卒卹如禮蔭負文章名而立朝樹風概敢言與人
有始終其再假歸也乾學方罷官家居領書局洞庭山中兩江總督傅臘塔構
乾學將興大獄素交皆引去蔭日暮造門且就當事白其誣乃已其復起也上
遇之厚嘗曰韓茂天下才美風度奏對誠實又曰蔭學問優長文章大雅前代
所僅有所撰擬能道朕意中事會江甯布政使張萬祿蝕帑金三十餘萬金總
督阿山庇之謂費由南巡下廷臣議有言阿山與有連妄語罪當死蔭謂縱有
連情私而語公忌者增益其語入告上由是疏蔭及再謝病詔責其教習庶吉
士每日率以飲酒多廢學九卿集議不爲國事直言惟事隙徇蔭意不自得病
甚飲不輟至卒乾隆十七年高宗諭獎蔭雅學績文湛深經術所撰制義清真
雅正開風氣之先爲藝林楷則追諡文懿子孝嗣舉人孝基進士官編修蔭卒
奉母不出十餘年雍正初召修明史書成移疾歸年九十而終

湯右曾字西厓浙江仁和人康熙二十七年進士改庶吉士授編修出典貴州試三十九年授刑科給事中兩廣總督石琳疏言瓊州生黎以文武官吏婪索激而爲亂上遣侍郎凱音布學士邵穆布按治右曾疏言揭帖言瓊州文武官往黎峒採取沈香花梨致生釁石琳及巡撫蕭永藻提督殷化行平時絕不覺察且黎亂在上年遲且一載始行題報掩飾欺隱請嚴加處分石琳等皆下吏議四十年疏請刊頒政治典訓及御製文集四十一年轉戶部掌印給事中初以私錢多改錢制輕小使私鑄無所利顧仍不止上令仍鑄大錢下廷臣議改鑄大錢其舊鑄小錢期二年銷燬右曾疏言改大錢宜遵聖諭若毀小錢則民間必驚擾且戶工二部存錢八十四萬串若議銷毀工料耗折甚多且二年中鑄出新錢不過一百萬串豈能遍及各省新錢無多舊錢已毀恐私鑄更繁錢法愈壞古者患錢重則改輕而不廢重患錢輕則改重而不廢輕使子母相權而行新鑄重錢每串作銀一兩舊鑄輕錢作七錢並聽行使積久大錢流通小錢自不行矣疏再下廷臣議定新錢每重一錢四分舊錢並行勿禁如右曾議

四十四年提督河南學政秩滿巡撫汪顯疏言右曾取士公明四十八年遷奉天府府丞四十九年遷光祿寺卿五十年轉太常寺卿通政使五十一年擢翰林院掌院學士五十二年授吏部侍郎尙書富弼安陳鵬翮皆廉辦有威稜右曾貳之銳意文案糾剔是非選人或挾大力以相要必破其機紐俾終不獲選由是干進射利者皆叢怨於吏部而富弼安往莅西師鵬翮任事久見知於上深莫可搖動遂爭爲浮言據右曾六十年命解右曾侍郎仍專領掌院學士六十年卒右曾少工詩清遠鮮潤其後師事王士禛稱入室使貴州後風格益進鍛鍊澄汰神韻泠然右曾朝熱河行在上命進所爲詩右曾方詠文光果即以進上上爲和詩有句曰叢香密葉待詩公右曾自定集遂取是詩冠首論曰方藹荃杜訥以文學直內廷其結主知尤在於廉謙元洪三禮議禮各巾其所見有當於經指士禛以詩被遇清和粹美蔚爲一代正宗英於文亦然久而論定並邀補設增文字之重右曾師事士禛繼以詩被遇論者謂自明宏治正德以後一百五十年而文章復在臺閣爲聖祖崇儒右文之效云

清史稿

列傳五十四

張玉書

李天馥

吳璵

張英

廷子 諱 璵

廷 璵

陳廷敬

溫達

和 倫

蕭永藻

嵩祝

王頊齡

張玉書字素存江南丹徒人父九徵字湘曉順治二年舉鄉試第一九年成進士博學礪行精春秋三傳尤邃於史歷吏部文選郎中出爲河南提學僉事考績最當超擢遽引疾歸玉書順治十八年進士選庶吉士授編修累遷左庶子充日講起居注官康熙十九年以進講稱旨加詹事銜二十年擢內閣學士充經筵講官尋遷禮部侍郎兼翰林院掌院學士三藩平有請行封禪者玉書建議駁之事遂寢二十三年丁父憂上遣內閣學士王鴻緒至邸賜奠服闋即家起刑部尙書調兵部二十七年河道總督靳輔奏中河工成時學士開音布往

勘稱善監高郵石工疏請閉塞支河口爲中河蓄水上以于成龍嘗奏輔開中河無益累民今中河工成乃命玉書偕尙書圖納等往勘並徧察毛城鋪高家堰及海口狀瀕行上謂玉書曰此行當秉公陳奏毋效熊一瀟託故推諉爲也玉書等還奏勘閱河形黃河西岸出水高年來水大未溢出岸上知河身並未淤塞海口岸寬二三里河流入海無所阻中河工成舟楫往來免涉黃河一百八十里之險但與黃河逼河寬固不可狹又不能容運河及駱馬湖之水擬請於蕭家渡楊家莊增建減水壩相時宣洩閉塞支河口應如開音布議上悉從之浙江巡撫金鉉以民杜光遇陳訴駐防滿洲兵擾民下布政使李之粹察訊之粹咨杭州將軍郭丕請申禁郭丕以聞上遣尙書熊賜履往按賜履丁憂去改命玉書尋調禮部二十八年上南巡駐蹕蘇州玉書還奏杜光遇無其所陳訴皆虛妄金鉉李之粹皆坐奪官流徙二十九年拜文華殿大學士兼戶部尙書三十一年靳輔奏高家堰加築小隄復命玉書偕圖納往勘還言曩者黃漲淮流被逼故洪澤湖水視昔爲高今擬築隄距高家堰甚近若水漲則高堰

大隄且不保築小隄何益因條列高家堰河工自史家刮至周橋一萬四百餘丈宜築隄三官廟諸口宜改石工今擬築小隄處宜令河臣每歲親勘上深然之三十五年上親征噶爾丹玉書扈行預參帷幄師次克魯倫河噶爾丹北竄大將軍費揚古截擊斬殺幾盡噶爾丹僅以身免玉書率百官上賀三十六年充平定朔漠方略總裁官丁母憂遣官賜祭并賜御書松蔭堂榜三十八年上南巡玉書迎謁賜賚有加三十九年服未闋召至京入閣視事四十年扈駕南巡駐蹕江甯召試士子命爲閱卷官御舟次高資港玉書奏言前去鎮江不遠請幸江天寺留駐數日上爲留一日四十六年河道總督張鵬翮請開溜淮套河上南巡次清口勘視見所樹標竿多在民塚召鵬翮極斥其非玉書奏曰向者老人白英議引汶水南北分流不若別作壩引汶水通漕其下流專以淮水敵黃黃水趨海此萬世利也上善其言遂諭鵬翮罷開溜淮套事具鵬翮傳四十九年以疾乞休溫旨慰留五十年從幸熱河甫至疾作遂卒年七十一上深惜之親製輓詩賜白金千命內務府監製棺槨衾綬驛送其喪還京師加贈太子

太保諡文貞五十二年上追念舊勞擢其子編修逸少爲侍讀學士玉書謹慎廉潔居政地二十年遠避權勢門無雜賓從容密勿爲聖祖所親任自奉儉約飲食服御略如寒素雍正中入祀賢良祠

李天馥字湘北河南永城人先世在明初以軍功得世襲廬州衛指揮僉事家合肥有族子占永城衛籍天馥以其籍舉鄉試順治十五年成進士選庶吉士授檢討博聞約取究心經世之學名藉甚累擢內閣學士充經筵講官每侍直有所見悉陳無隱聖祖器之康熙十九年夏旱命偕大學士明珠會三法司慮囚有矜疑者悉從末減尋擢戶部侍郎調吏部杜絕苞苴嚴峻一無所私銓政稱平二十七年遷工部尙書河道總督靳輔議築高家堰重隄束水出清口停潞海口于成龍主疏濬下河上召二人詣京師入對仍各持一說下廷臣詳議天馥謂下河海口當濬高堰重隄宜停築上然之歷刑兵吏諸部三十一年拜武英殿大學士上曰機務重任不可用喜事人天馥老成清慎學行俱優朕知其必不生事三十二年以母憂回籍上賜貞松榜御書勉以儒者之學復謂天

馥侍朕三十餘年未嘗有失三年易過命懸缺以待三十四年服將闋起故官入閣視事上親征厄魯特平定朔漠兵革甫息天馥務以清靜和平與民休息嘗謂變法不如守法奉行成憲不失尺寸乃所以報也三十八年卒諡文定天馥在位留意人才嘗應詔舉彭鵬陸隴其邵嗣堯卒爲名臣爲學士時冬月慮囚有知縣李方廣坐當死天馥言其有才得緩決尋以赦免刑部囚多瘕斃爲庀屋材多爲之所別罪之輕重以居活者尤衆事親孝居喪廬墓有雙白燕飛至不去人名其居爲白燕廬子孚青進士官編修父喪歸不復出

吳璵字伯美山西沁州人順治十六年進士授河南確山知縣縣遭明季流寇殘破璵拊流亡闕蕪廢墾田歲增捕獲盜魁誅之師下雲南縣當孔道輿馬糧餉先事籌辦而民不擾康熙十三年以卓異入爲吏部主事歷郎中累遷通政司右參議刑部尙書魏象樞稱其賢二十年特擢右通政累遷左副都御史疏請復督撫巡方略言令甲督撫於命下之日卽杜門屏客蒞任守令不得參謁凡有舉劾惟據道府揭報愛憎毀譽眞僞相亂督撫無由知革火耗而火耗

愈甚禁私派而私派愈增請敕督撫視歷各屬以知守令賢否或謂巡方恐勞擾百姓夫督撫賢則必能禁迎送卻供應如其不肖雖端坐會城而暮夜之餽踵至豈獨巡方足以勞民哉又言巡撫及巡守道無一旅之衛而提鎮各建高牙前撫臣如馬雄鎮道臣如陳啓泰懷忠秉義向使各有兵馬奚至束手宜及此時復舊制使巡撫巡守道仍各管兵馬減提督增總兵以一鎮之兵酌分數鎮聽督撫節制二十八年遷兵部侍郎尋授湖廣巡撫湖北自裁兵亂後姦猾率指仇人爲亂黨株連不已璵悉置不問而懲其妄訐者人心大定陝西饑流民入湖廣就食令有司分振全活甚衆三十一年詔以荊州兵船運漕米十萬石至襄陽備賑璵議兵船泊大江下至漢口受米復西上抵襄陽計程二千餘里今原運漕船若乘夏水順道赴襄陽僅七百餘里即以便宜行事疏入上嘉之未幾丁母憂服未闋即授湖廣總督仍聽終制乃赴任故事土司見州縣吏不敢抗禮其後大吏稍稍假借之璵至絕餽遺飭謁見長吏悉循舊制或犯約束檄諭之無敢肆者三十五年召爲左都御史三十六年典會試上北征回鑾

顧迎駕諸臣褒璵及河道總督張鵬翮居官之廉卽擢璵爲刑部尙書而以鵬翮爲左都御史三十七年拜保和殿大學士兼刑部璵熟諳舊章參決庶務靡不允當奏對皆竭忱悃上每稱善所薦引多賢能更三十九年復典會試上手書風度端凝榜賜之尋具疏乞休不允上嘗臨米芾書以賜璵書其後曰吳璵寬厚和平持己清廉先任封疆軍民受其實惠朝中之事而折廷諍能得其正朕甚重其能得大臣之體四十四年卒諡文端翰林院撰祭文上以爲未能盡璵敕改撰吏部奏大學士缺員上以璵喪未歸懸缺未卽別除曰朕心不忍也璵所至多惠政兩湖及碓山皆祠祀初沁州薦饑璵糴米振之全活無算有司議增沁糧一千三百石璵力爭乃已鄉人德之立祠以祀雍正中祀賢良祠張英字敦復江南桐城人康熙六年進士選庶吉士父憂歸服闋授編修充日講起居注官累遷侍讀學士十六年聖祖命擇詞臣諄諄有學者日侍左右設南書房命英入直賜第西安門內詞臣賜居禁城自此始時方討三藩軍書旁午上日御乾清門聽政後卽幸懋勤殿與儒臣講論經義英率辰入暮出退或

復宜召輟食趨宮門慎密恪勤上益器之幸南苑及巡行四方必以英從一時制誥多出其手遷翰林院學士兼禮部侍郎二十年以葬父乞假優詔允之賜白金五百表裏緞二十予其父秉彝卹典視英官英歸築室龍眠山中居四年起故官遷兵部侍郎調禮部兼管詹事府充經筵講官奏進孝經衍義命刊布二十八年擢工部尙書兼翰林院掌院學士仍管詹事府調禮部兼官如故編修楊瑄撰都統一等公侈國綱祭文失辭坐奪官流徙斥英不詳審罷尙書仍管翰林院詹事府教習庶吉士尋復官充國史一統志淵鑒類函政治典訓平定朔漠方略總裁官三十六年典會試尋以疾乞休不允三十八年拜文華殿大學士兼禮部英性和易不務表襮有所薦舉終不使其人知所居無赫赫名在講筵民生利病四方水旱知無不言聖祖嘗語執政張英始終敬慎有古大臣風四十年以衰病求能詔許致仕瀕行賜宴暢春園敕部馳驛如制四十四年上南巡英迎駕淮安賜御書榜額白金千兩至江甯上將旋蹕以英懇奏允留一日時總督阿山欲加錢糧耗銀供南巡費江甯知府陳鵬年持不可阿山

怒鵬年欲因是罪之供張故不辦左右又中以蜚語禍將不測及英入見上問江南廉吏首舉鵬年阿山意爲沮鵬年以是受知於上爲名臣四十六年上復南巡英迎駕清江浦仍隨至江寧賜賚有加英自壯歲即有田園之思致政後優遊林下者七年爲聰訓齋語恒產瑣言以務本力田隨分知足詰誠子弟四十七年卒諡文端世宗讀書乾清宮英嘗侍講經書及卽位追念舊學贈太子大傅賜御書榜額揭諸祠宇雍正八年入祀賢良祠高宗立加贈太傅子廷瓚字尚臣康熙十八年進士自編修累官少詹事先英卒廷玉自有傳廷璐字寶臣康熙五十七年殿試一甲第二名進士授編修直南書房遷侍講學士雍正元年督學河南坐事奪職尋起侍講遷解事兩督江蘇學政武進劉綸長洲沈德潛皆出其門并致通顯有名於時進禮部侍郎予告歸卒廷瑑字桓臣雍正元年進士自編修累官工部侍郎充日講官起居注初無條例廷瑑編載詳贍得體既擢侍郎兼職如故終清世已出翰林而仍職記注者惟廷瑑乾隆九年改補內閣學士兼禮部侍郎典試江西移疾歸廷瑑性誠篤細微必慎既歸刻

苦礪行耿介不妄取三十九年卒年八十四上聞顧左右曰張廷琰兄弟皆舊臣賢者今盡矣安可得也因歎息久之廷璐子若需進士官侍講若需子曾敏進士官少詹事自英後以科第世其家四世皆爲講官

陳廷敬初名敬字子端山西澤州人順治十五年進士選庶吉士是科館選又有順天通州陳敬上爲加廷字以別之十八年充會試同考官尋授秘書院檢討康熙元年假歸四年補原官累遷翰林院侍講學士充日講起居注官十四年擢內閣學士兼禮部侍郎充經筵講官改翰林院掌院學士教習庶吉士與學士張英日直弘德殿聖祖器之與英及掌院學士喇沙里同賜貂皮五十表裏綬各二十七年命直南書房丁母憂遣官慰問賜茶酒服除起故官二十一年典會試滇南平更定朝會燕饗樂章命廷敬撰擬下所司肄習遷禮部侍郎二十三年調吏部兼管戶部錢法疏言自古鑄錢時輕時重未有數十年而不改者向日銀一兩易錢千今僅得九百其故在燬錢鬻銅順治十年因錢賤壅滯改舊重一錢者爲一錢二分五釐十七年又增爲一錢四分所以杜私鑄也

今私鑄自如應改重爲輕則燬錢不禁自絕產銅之地宜停收稅聽民開採則銅日多錢價益平疏下部議行擢左都御史疏言古者衣冠輿馬服飾器用賤不得踰貴小不得加大今等威未辨奢侈未除機絲所織花草蟲魚時新時異轉相摹效由是富者黷貨無已貧者恥其不如冒利觸禁其始由於不儉其繼至於不廉請敕廷臣嚴申定制以挽頹風又言方今要務首在督撫得人爲督撫者不以利欲動其心然後能正身以董吏吏不以曲事上官爲心然後能加意於民民可徐得其養養立而後教行宜飭督撫凡保薦州縣吏必具列無加派火耗無黷貨詞訟無賂削富民每月吉集衆講解聖諭使知功令之重在此而皇上考察督撫則以潔己教吏吏得一心養民教民爲稱職庶幾大法而小廉又言水旱凶荒堯湯之世所不能盡無惟備及於豫而調當其急故民恃以無恐山東去年題報水災戶部初議行令履勘繼又行令分晰地畝高下今年四月始行覆准蠲免如此其遲回者所行之例則然耳臣愚以爲被災分數既有冊結可據即宜具覆豁免上宣聖主勤民之意下慰小民望澤之心中不使

吏胥緣爲弊竇疏並議行二十五年遷工部尙書與學士徐乾學奏進鑑古輯覽上嘉其有裨治化命留覽時修輯三朝聖訓政治典訓方略一統志明史廷敬並充總裁官累調戶吏二部二十七年法司逮問湖廣巡撫張汧汧曾齎銀赴京行賄獄急語涉廷敬及尙書徐乾學詹事高士奇上置勿問廷敬乃以父老疏乞歸養詔許解任仍管修書事二十九年超左都御史遷工部尙書調刑部丁父憂服闋授戶部尙書調吏部四十二年拜文淵閣大學士兼吏部仍直經筵四十四年扈從南巡召試士子命閱卷四十九年以疾乞休允之會大學士張玉書卒李光地病在告召廷敬仍入閣視事五十一年卒上深惜之親製輓詩一章命皇三子允祉奠茶酒又命部院大臣會其喪賜白金千諡文貞廷敬初以賜石榴子詩受知聖祖後進所著詩集上稱其清雅醇厚賜詩題卷端嘗召見問朝臣誰能詩者以王士禛對又舉汪琬應博學鴻儒並以文學有名於時上御門召九卿舉廉吏諸臣各有所舉語未竟上特問廷敬廷敬奏知縣陸隴其邵嗣堯皆清官雖治狀不同其廉則一也乃皆擢御史始廷敬嘗亟稱

兩人或謂曰兩人廉而剛剛易折且多怨恐及公廷敬曰果賢歟雖折且怨庸何傷

溫達費莫氏滿洲鎮黃旗人自筆帖式授都察院都事遷戶部員外郎康熙十九年授陝西道御史遷吏科給事中兼管佐領授兵部督捕理事官三十五年上親征噶爾丹命溫達隨皇七子允祜都統都爾瑪管鎮黃旗大營三十六年擢內閣學士三十八年遷戶部侍郎四十年命赴山西陝西察驗驛馬還授議政大臣雲貴總督巴錫劾游擊高鑑獄不當並論提督李芳述徇隱芳述亦劾巴錫命溫達往按鑑罪應徒巴錫左遷芳述罰俸四十一年調吏部擢左都御史四十二年復命往貴州按威甯總兵孟大志侵餉論罪如律四十三年遷工部尚書充經筵講官四十六年授文華殿大學士纂修國史政治典訓平定朔漠方略大清一統志明史並充總裁五十年命八旗及部院舉孝義因諭曰孝爲百行首如大學士溫達尚書穆和倫富甯安之孝不特衆所知朕亦深知之也御製詩以賜復褒其孝友五十三年以老乞休許致仕尋諭溫達雖老尚

自康健命仍任大學士五十四年卒命皇子奠茶酒賜祭葬諡文簡穆和倫喜塔臘氏滿洲鎮藍旗人自兵部筆帖式四遷爲御史又三遷爲內閣學士命往山東察賑自泰安至鄒城康熙四十三年遷工部侍郎四十八年授禮部尙書四十九年調戶部上稱穆和倫孝其母年已九十御書北堂眉壽榜賜之兩江總督噶禮與巡撫張伯行互劾命穆和倫往按右噶禮上責其是非顛倒終直伯行尋以老病乞休復起授戶部尙書坐事當左遷尋卒

蕭永藻漢軍鎮白旗人父養元管佐領永藻自廢生補刑部筆帖式康熙十六年授內閣中書遷禮部員外郎襲佐領遷郎中監湖口稅務授御史再遷順天府尹三十五年擢廣東巡撫疏言錢多價賤每千市價三錢二三分兵領一兩之餉不及數錢之用民亦因錢賤貨物難行請暫停鼓鑄又疏言開山發礦多人羣聚良莠淆雜臣通飭嚴禁近有長寧匪徒集衆私採知縣尤鵬翔請飭部議處鵬翔坐奪官三十九年給事中湯右曾劾永藻與總督石琳於黎人爭門事迨至一載始行具題縱屬吏朘民民困而爲盜海則電白陽江山則英德翁

源橫行劫掠上命與廣西巡撫彭鵬互調入覲上諭當命鵬所行並誠薦舉
當擇清廉四十五年遷兵部侍郎湖廣總督石文晟劾容美土司田舜年不法
命左都御史梅錕內閣學士二格往獄與文晟異議復命永藻與大學士席哈
納侍郎張廷樞覆獄還奏舜年已死無諸僭越狀四十六年擢左都御史遷兵
部尙書四十八年湖南巡撫趙申喬與提督俞益謨交惡互劾命永藻偕副都
御史王度昭往按得益謨違例缺兵額狀申喬事事苛求非大臣體並擬奪官
上罷益謨留申喬四十九年調吏部旋授文華殿大學士五十六年列議政大
臣六十一年世宗卽位加太子太傅命駐馬蘭峪守護景陵雍正五年宗人府
奏護陵宗室廣善越分請安永藻不先阻當奪官上責永藻自恃其有操守驕
矜偏執惟知阿諛允禩長其傲慢狂肆之罪如議奪官仍命護陵自效七年卒
年八十六

嵩祝赫舍里氏滿洲鑲白旗人父岱袞事太宗協管佐領兄來袞自侍衛累遷
至內三院學士授世職拜他喇布勒哈番嵩祝襲職康熙九年管佐領二十三

年遷護軍參領三十三年擢內閣學士三十四年盛京旱命與侍郎珠都納偕往發海運米萬石散貧民萬石平糶還京命復偕珠都納往開原等散米上諭曰將軍等請散米但言兵不言民此皆朕赤子當一併給與月與米一斗五升至來歲四月嵩祝等散米如上指事畢還京師三十五上年親征噶爾丹嵩祝管正黃旗行營師還命統後隊緩行待西路章奏還兵部侍郎改護軍統領三十六年復扈上出塞駐蹕夏命昭武將軍喀斯喀等窮追噶爾丹嵩祝參贊軍務噶爾丹竄死師至摩該圖引還四十年遷正黃旗漢軍都統廣東官兵剿連州搖失利命嵩祝偕副都統達爾占侍郎傅繼祖往會總督石琳調廣西湖南兵進剿即授廣州將軍瀕行上諭以相機招撫四十一年師次連州檄三省官兵分布要隘搖人薙髮請降執戕官兵者九人誅之師引還調正紅旗四十八年署奉天將軍海盜舟泊雙島挾火器出掠遣兵擊殺三十餘人得其舟一疏請山東水師兼巡奉天屬金州鐵山又請選盛京滿洲兵千人習鳥槍設火器營皆從之遷禮部尙書五十一年授文華殿大學士五十五上年幸熱河嵩祝

從久不雨上憂旱甚遣嵩祝還京師察諸大臣祈雨不躬至者劾奏六十一年
世宗卽位加太子太傅修聖祖實錄及玉牒並充總裁五年奉天將軍噶爾弼
奏貝子蘇努爲將軍時借放庫銀三萬餘嵩祝坐徇隱奪官十三年卒年七十
九

王頊齡字顓士江南華亭人父廣心字農山有文名順治六年進士官御史巡
視京通二倉釐剔漕弊姦猾屏跡頊齡康熙十五年進士授太常寺博士十八
年舉博學鴻儒召試一等授編修纂修明史充日講起居注官二十一年上元
節聖祖御乾清宮賜廷臣宴仿柏梁體賦詩頊齡與焉遷侍講督四川學政累
遷侍講學士二十八年左都御史郭琇疏劾少詹事高士奇與頊齡弟鴻緒植
黨營私並詆頊齡與士奇結婚媾交關爲奸利頊齡士奇鴻緒並休致尋命頊
齡留任如故轉侍讀學士以父憂歸服闋起故官累擢禮部侍郎四十三年上
南巡幸頊齡所居秀甲園賜御書榜四十六年上南巡閱河再幸其第尋調吏
部充經筵講官擢工部尙書典會試五十五年拜武英殿大學士雍正元年詔

開恩榜項齡重與鹿鳴宴加太子太傅以老累疏乞休上以項齡先朝舊臣勤勞歲久諳習典章輒與慰留三年痰作命御醫治疾賜參餌尋卒年八十四上爲輟朝一日令朝臣出其門下者素服持喪各部院漢官會祭贈太傅諡文恭弟九齡字子武進士授編修官至左都御史鴻緒自有傳

論曰玉書等遭際承平致位宰相或以文學進或以功能著或以節操用皆循循乎矩度卽朝旨所褒許於玉書則曰小心於天馥則曰勤慎英曰忠純瑛曰寬厚廷敬曰清勤溫達孝永葆廉嵩祝老成項齡安靜諸臣之行詣顯世運之敦龐亦可見矣